

# TUSASS MUSIC NIPILERSORTARTUNUT SANAAJUVOQ

Tusass decembarip 21-anni app-imik nipilersukkanik appisimaarfusinnaasumik Tusass Musicimik saqqummersitsivoq. App-i tusarnaartartunit nipilersortartuniillu nuannarineqarluarpoq. App-i pillugu paasisutissanik suli pisariaqartitsisoqarneranut atatillugu maanna Tusass itinerusumik paasisutissiivoq.

Tusass Music tassaavoq kalaallit nipilersugaasa digitaliumik ataatsimut eqiteriffiat, tassanilu ukiuni 60-ini kingullerni nipilersukkat 4000-t sinnillit tusarnaarsinnaavatit. Piffissap ingerlanerani nipilersortartut nipilersukkaminnik app-imi saqqummersitsiniarlutik aalajangerpata nipilersukkat ilanngunneqartassapput.


App-imik sananermi siunertaasimavoq kalaallit nipilersugaasa maannamut sumi tamaani siammarsimasut ataatsimut katersorneqarnissaat.

Amerlasuut nipilersukkanik qarasaasiaminni kopeerineq, cd-nut nuussineq kasettebandinulluunniit immiussineq atugarisarsimagaluarpaat.

Taamaasiortoqartarnera nipilersortartunut aningaasarsiuutaasinnaasangilaq, tamannalu tunngavigalugu Tusass isumaqarpoq app-ip kalaallinit sanaajusup pilersinnissaa pitsaanerpaajussasoq.

**"Tusass Musicip atugarineratigut kalaallit nipilersugaat, oqaatsivut kulturepullu aallullugillu ataavartissinnaavagut. Nunatta kulturikkut kingornussaasa oqaluttuarisaaneratalu tapersersimaneqarlutik nukittorsarnissaannut attasseqataassaaq inuiaallu kinaassusianik ataqatigiissitsilluni. Aammattaaq app-i atorlugu Nunatsinnut, oqaatsitsinnut kulturitsinnullu soqutiginnineq annertusarlugulu ineriartortissinnaavarput. Taamatutaaq nipilersortartut suliaminnik akissarsilluarnerunissaat qulakkeerineqataaffigalugu."**

— Nikolaj Christoffersen,  
Tusassimi niuernermut pisortaq



## Kaaviiartitat agguanneqartarnerat

Tusass agguassisarnissamut najoqqutassiorsimavoq, taannalu atuisut 7.000-10.000-illu akornanniittut aallaavigalugit suliaavoq. Atuisuuffik qaammammut 49 kr.-qarpoq.

7000-t atuisuuppata qaammammut 343.000 koruuninik kaaviiartitassaqaassaaq.

Taakkunannga Tusassip 33,03 procenti. Tusassip app-ip ingerlanneranut taassuminngalu pilersueqatasunut akiliutissaminut ussassaarutinullu atortussaavai. Taamaammat Tusass app-imit iluanaaruteqanngilaq.

Sinneri 229.673 koruunit (66,96 procentit) nipilersortartunut agguanneqassapput. Koda 15 procentinik, 51.450 koruuninik pissarsissaaq, DiGiDilu nipilersortartunik

(assersuutigalugu Atlantic Musicimik aamma ULO-mik) isumaqatigiissuteqartartoq 51,96 procentinik, tassa 178.223 koruuninik pissarsissalluni.

DiGiDi-p, peqatigiiffiusoq iluanaarniuteqanngitsoq, aningaasat taakkua 6-8 procentiinnaat tigummisarpai, sinnerilu nipilersortartunut agguanneqartarlutik tusarnaarneqartarnerit amerlassusiat tunngavigalugu. Naatsorsuutigigutsigu atuisut tamarmik qaammammut nipilersukkat 250-it tusarnaartaraat, taava atuisut 7000-t tusarnaartarpata nipilersukkap ataatsip ataasiarluni tusarnaarnera 0,13 koruuninik isertiffsissaaq.

10.000-nik atuisoqarpoq, kaaviiaartitat 490.000 koruuni-ussapput, taamaasilluni nipilersortartut 71,77 procentisapput nipilersugarlu ataaseq tusarnaarneqaraangat 0,14 koruuninik akilerneqartassalluni.

Spotifykulli tusarnaarnermut sanilliutissagaanni tassani tusarnaarnermi ataatsimi nipilersugaq 0,03 koruuninik akilerneqartarpoq. Tusass Music Spotifymit sisamariaammik (imaluunniit annertunerusumik) nipilersortartunut akiliisarpoq.

### **Killiliisimaneq – sumi aamma sooq?**

Tusass Musicip atulersinneratigut Tusassip kissaatigaa kalaallit nipilersortartut nipilersuusiaminnik sapinngisamik pissarsilluarnissaat. Taamaattumik aamma pingaaruteqarpoq kalaallit nipilersugaasa Tusass Musicimi, nipilersortartut pissarsiasaqaqfiginerpaasaanni, eqiterinneqarnissaat.

Tusass Musicimik ingerlatsinermi suleqatigineqartoq DiGiDi nittartakkamini naliliivoq inuit 4000-t Tusass Musicimi akiliillutik atuisarmata nipilersortartut streamingimik kiffartuussivinni allanit tamanit pissarsiaqarnerusartut.

Taamatut immikkut aqqiisimanerup kingunerisaanik kalaallit nipilersortartut ataatsimut tusarnaartitsisarfeqaqalerput, tusarnaartut nipilersukkanik nutaanik pisoqqanillu tusarnaarsinnaallutik qanga pisunut utersaarsinnaallutik isumataarnermillu sunnerneqarsinnaallutik.

Tusassip nipilersortartut nipilersukkaminnik Europamut, USA-mut nunarsuarmulluunniit sumiiffinnut allanut tuniagaaqarnissaannik killilersorneq ajorpai. Killilersuineq taamaallaat Nunatsinni Danmarkimilu atuuppoq, nunarsuulli sinneranut nipilersukkanik tusarnaartarfinni Spotifymi, Tidalimi Apple Musicimiluunniit ilineqarsinnaajuannarput.

Taamaattumik Tusassip kissaatigaa neriuutigalugulu nipilersortartut sapinngisamik kalaallit najugaqaqfigisaanni aningaasarsiorsinnaassasut, tamatumalu saniatigut nunarsuaq tamakkerlugu appisimaartarfiit allat aqqutigalugit siammarterneqarsinnaassallutik.

### **Kalaallit Nunaata inuisa 10 procentii**

Tusass Music atulernerminiit iluatsilluarpoq. App-ip saqqummersinneqarneranit qaammatit marluinnaat qaangiuttut 6000-t – Kalaallit Nunaanni innuttaasut 10 procentii sinnerlugit – atuisunngorsimapput!

Tassa app-i taanna nioqqutissanit allanit tamanit atorneqarnerpaasimavoq. App-ip iluatsilluarsimaneranut takussutissaapput atuisartut amerlassusiat nipilersukkallu tusarnaarneqartartut amerlassusiat. Qaammatip aappaa avillugu qaangiutinngitsoq nipilersukkat 1,5 millionit amerlanerusut tusarnaarneqarsimapput.

Atuisut amerlassusiat tunngavigalugu naatsorsorneqarsinnaavoq qaammammut 180.000 koruunit sinnerlugit nipilersortartunut agguanneqartassasut.

### **Tusass Musicimi nipilersukkat – ajornanngaat**

Tusassip siunertarisimangisaannarpaq Tusass Music aqqutigalugu kalaallit kulturiannik aningaasarsiufiginninissani, siunertarisimalluguli kalaallit kulturiat sapinngisamik nipilersortartut namminneq pissarsiffiginerpaassagaat. Tusassip neriuutigaa app-ikkut tusarnaartartut nipilersortartullu apeqqutaat aamma allat ilanngullugit matumani akineqarsimassasut.

Nipilersortartut nipilersugaatiminnik Tusass Musicimifitserusuttut kajumissaarpavut DiGiDi-mut attaveqaqqullugit, taakkua nipilersukkat Tusass Musicimut ilanngunnissaannik ikiorumaarpaatsit. Taamaalillutit aamma illit pissarsialersinnaassaattit – immaqaluunniimmi nipilersukkat illit nammineq sanaattit app-imi saqqummernissaat tusarnaartartorpasuarnit utaqqimaarneqaannarput.

> [DiGiDi](#)

> [Nipilersuusiatif Tusass Musicimut imatut saqqummersitsinnaavatit](#)